

FURÚMIÑETU LIGÁRADAN PÁBLO JOUN TESALÓNICANA

Labúrüjan Páblo jáma líbirigu joun tílana
ligílisi to ubúruguboun Tesalónica

1 ¹Áu Páblo lúma Silváno láu Timotéo, wabúrüjañoun gárada to jun, jugúya tílana ligílisi to Tesalónicaboun, ja lánigubaña Wáguchi Búngiu lúma gíñe Wabúreme Jesucrístu. Resíbi jumeí abíniruni lúma darángilaü jámagiñe.

Jémpulu lánina afíñeni lé meja jarúfudubei Tesalónica

²Súnwandan weteíngiruni Búngiu juágu, sun jugúya, jarítagua wagía juágu súnwandan lídan wayúmuragun lun Búngiu. ³Jarítaguatiwa ligíbugiñe Wáguchi luágu lubuídun jesériwidun lun Jesucrístu ladúga jafíñen luágu, lúma lubuídun jóuseruniña wánigu ladúga buin tíña lan janígi láu ínsiñejabuni, lúma lubuídun jawánduni sun asúfuriruni ladúga jeménigidun luágu Wabúreme Jesucrístu le ídaangiñebei lan jachúlüra siélun. ⁴Nidújeñu, jínsiñetün lun Búngiu, áni subúdi wamúti luágu anúadaja láadün lan.

⁵Lugúndun dán meja le wapúrichijanbalin ugánu luáguti asálbaruni jun, merésibirun jumúti queísirügü dimúrei, ñadágimeinti tídan janígi, láu lubáfu Sífiri Sándu, lun lasáansiraguni jigáburi. Resíbi jumúti meja ugánu ligía láu ichoúruni le tímatimaati luágu inárüni lan. Subúdi jumúti lubuídun woúserun jagánagua, lun ábanbadiwa lan jémpulu buíti jun.

⁶Ába jáyeijani wagáburi, lúma ligáburi Wabúreme Jesucrístu, resíbi jumúti ugánu luágu láu ában ugúndani le líchugubei Sífiri Sándu jun, láu sun barú lan jerésibiruni Crístu asúfuriruni jun. ⁷Ítara líña jiábin lun ábanbadün lan jémpulu joun sun afíñetiña ja loúbawagubaña Macedónia lúma Acáya. ⁸Burúguaali ugánu luágu Wabúreme Jesucrístu júmagiñe, mámarügü loúbawagu Macedónia lúma Acáya, burúguaali lídan sun fulásu, áni subúdiwaali luágu afíñeni le jibíjubei luágu Búngiu

lídán sun fulásu. Memégeirunwati wabájüdagun luágu jaffínen joun güirígia, ⁹lubáragiñe líra, jagía guánarügü adímurejatiña woun luágu webélujan júmoun, abájüdagua jagía luágu lubuídun jerésibiruniwa, lúma luágu jígiruni jájuduragun joun sándu lun jafálaruni Búngiu, ába jagúmeserun esériwida lun Búngiu le wínwanbei, le gíñe tímatimaatibei. ¹⁰Abájüdaguatiña gíñe juágu luágu jagúrabajañein lan lagíribudun Liraú Búngiu siélugiñe—Jesúsu le lásaaragüdübei Búngiu lídaangiñe ouweni, le asálbarubáliwa lueí lanárime afáyeiruaiaú luágu figoú le lúnbei liábin.

Luwádigimari Páblo Tesalónica

2 ¹Jugúya guánarügü, nidújeñu, subúdi jumúti luágu máma lán meja luágu ni cáta wóúdin aríjañ. ²Queísi jasúbudiruni, wuríbatí meja jóuseruniwa güirígia ja Filípobaña, ába wayábin júmoun ladúgarügü líchugun Búngiu anígi woun lun wadúgüni. Ába wapúrichijani ugánu le lánina asálbaruni jun, mebéresenga wagía láu le lúnbei wasúfuriruni jámagiñe güirígia ja mísiñejabúbaña lun ugánu ligía. ³Máma wapúrichijaña ladúga jamúga buléiguai, queísi jaríñaguni wáganiñu, ni láu luríban arítaguni, ni lun wayéedagunün. ⁴Lubáragiñe líra, aríja lumúti Búngiu luágu buídu wamá, ába líchuguniwa lun wapúrichijani ugánu le lánina asálbaruni, ítara líñati wadímurejan lun wagúnfulirun lúma eménigini le lánbei Búngiu wawágu. Máfaaguntiwa lun gúnda jamá güirígia wáma, wáfaagun lun gúnda lan Búngiu wáma, le asúbudirubarun wanígi. ⁵Queísi jasúbudiruni, siñáti laríñawagún luágu adímureja wamá meja jun láu dimúrei buíduburiti, mayúsu wagía ni cátei lébuname wagáñeirun seínsu. Geféenti Búngiu luágu cátei le. ⁶Máluajantiwa lun wibíjin uweíriguni jámagiñe ámu güirígia, ni júmagiñe, láu sun gayára lan jamúga wasándiragüdüni lijúru wagúmadijan queísi lání Crístu apóstolugu. ⁷Lubáragiñe líra, oúserarügü wamútün láu ában uálíni queísi ában úguchuru to agúriajabaliña tirájüñü, oúnigira táña. ⁸Weíriti jínsiñe woun darí lun máma rügüñein lan jamúga lání Búngiu ugánu wabúseera wíchugun jun, buséntiwa jamúga wíchuguni wabágari guánarügü jun, le luweírin jínsiñe woun. ⁹Nidújeñu, jarítagua jumúti ligáburi wawádigimari lúma ligáburi wáfaagun lun wawínwandun. Nadágimeintiwa meja wéyuagu áriebru lun mámabadiwa lan ijúru gu lun ni ában jídaangiñe, sun awánja lan apúrichijei lání Búngiu ugánu jun. ¹⁰Geféentün, geféenti gíñe Búngiu luágu reídei wamá meja láu ában igáburi le jarúmati áni surú jídan, jugúya le afíñebei, míchugunga wagía lúgaaru lun ni ában lun líchugun wadúnrun. ¹¹Subúdi jumúti gíñe ída líña lan wíchugun gurásu jun lúma derégüdaguaú lun jafíñen, cáda ában jídaangiñe, quei ladúga ában úguchili joun lirájüñü. ¹²Aríñagaadiwa jun lun buídu lan jóuserun quei lúnti lan jóuserun lánigu Búngiu le agúarubei jun lun gafánran jumá lídan larúejan lúma luweírigun. ¹³Ligía, súnwandan lubéi weteíngiruni Búngiu, lugúndun dán meja le jagáambunbalin lání Búngiu ugánu le wapúrichijabei jun, resíbi jumúti

queísi ugánu láni Búngiu, máma queísi ugánu jáni wügúriña. Áni inárüni luágu láni lan Búngiu ugánu, le íchugubalin ubáfu jun lun jagáburidun buídu, jugúya le affínebei. ¹⁴Nidújeñu, dan le jeíbaajanbalün jupaísanun, suséreti jun quei méme le asúseredubei joun tílana buri ligílisi to Judéaboun, ja lánigu Búngiu lídaangiñe Jesucrístu, efbaaja jamútiña gíñe juríu ja japaísanun. ¹⁵Juríu, jagía áfarubalin Wabúreme Jesúsu jilágubei, áfaragua jamáña profétagu, áni bugá jamutiwa gíñe bougudin lueí jageíra. Magúndaanti Búngiu jáu, jáganiñu gíñe sun gürígia. ¹⁶Dan le wabúseerun wadímurejan joun ja mámabaña juríu lun gíñe jasálbarun, májatiñá yebe juríu lun wadügüni. Láu igáburi le, gánwounguagüda jamúti jafígoun. Ánjeinti guetó, liábindügürüga lanárime ligáni Búngiu jawágoun.

Busényati Páblo lídin aríjaña Tesalónicana

¹⁷Nidújeñu, murúsun dan lárigiñe wígirunün (láu sun ajúnja méme lan tídan wanígi) oúnwenbun wabúseerun woúdyna aríjaün. ¹⁸Jóuchatiwá yebe woúdin, áu Páblo, sarágu weíyaasu yebe noúchun nídín, áni ságü noúchun nadügüni, mígirun lumútina Máfia. ¹⁹Ladúga jugúya guánarü íchugubalin ugúndani woun, jugúyaba arúfudei lubuídun wesériwidun lun Wabúreme Jesucrístu le uágubei gayára lan wemenigidun lun werésibiruni wafáyeiruaaja dánme le lagíribudun, áni jugúyaba wagúndaaragüle dánme le jaráramun ligíbugiñe. ²⁰Jugúya lébunabei wagúndan, áni rújadün lébuna wadímurejan buíti joun ámu juágu.

3 ¹Dán meja le siñá wamaali awánda masúbudirunga ída líña lan sun cátei júma, ába warítangun luágu buídutima lan lun weréderun Aténas, áu lúma Silváno, ²lúma lun lídin wadúje Timotéo, le ában esériwiduti lun Búngiu lídan lapúrichijoún ugánu luágu Crístu le Wasálbaragüle, aríjaün. Oúnaja wamúti júmoun lun líderangunün arárama buídu lídan jaffínen, ru ligía gurásu jun, ³lun úa lan ni ában eíguaduti larúna lueígiñe buri lénreengúnga le lasúfurirubei luágu laffínerun luágu Crístu. Jugúya guánarügü subúdi jumúti luágu kúnti lan wagúrabajani asúfuriruni líbe le. ⁴Dán meja le awánjagua lan júma, aríñagatiwa meja jun luágu kúnti lan wagúrabajani asúfuriruni luágu líri Jesucrístu, áni ítara líña lasúseredun, quei jasúbudiruni. ⁵Ligía lébubei dán meja le siñánaali lan awánda, ába noúnajan álügüdaja ída jíña lan lídan jaffínen, ladúga nanúfude lueí jamuga línchajanün Máfia lun jígiruni jaffínen luágu Crístu, ába jamúga liábin wawádigimari jídan lun ni cáta me.

⁶Guetó, giríbujali Timotéo Tesalónicagiñe, áni barúti ugánu buíti woun luágu jaffínen lúma jínsiñejabu. Laríñajare woun luágu jarítagua jumá wawágu láu insiñeni súnwandan, luágu gíñe luweírin jabúseerun jarjiniíwa, ítara gíñe quei busén wamá warjiniün. ⁷ítara líña lubeíti, nidújeñu, rújali ugánu le sarágu gurásu woun labádinagua sun lénreengúnga lúma idíjeri le wasúfurirubei guetó. ⁸ítara líña quei iséri ibágari woun wasúbudiruni luágu derégüdagu jíña lan lúma Búngiu. ⁹Ída lubá funasan wíchugun eteíngiruni buídurügüti lun Búngiu juágu, lúma

luágu sarágu ugúndani le rújumaalíbei woun? ¹⁰Wéyuagu, árieibu, wayúmuragun lun Búngiu lun gayáraaya lan waríjiniin, gúnfuli lámuga le mégeibei lídan jaffínen.

¹¹Buséntiwa lun líderaguniíwa Wáguchi Búngiu lúma Wabúreme Jesucrístu lun gayára lan woúdin aríjaün, ¹²lun gíñe laweíridagüdüni Búngiu jínsiñegua júngua lúma jínsiñejabu joun sun gürígia, ítara quei jínsiñe jumá woun. ¹³Derégeguagüda lámugaün Wabúreme Búngiu júngua lun le gumúti, madúnruna jugúyame ligíbugiñe dánme liábin Wabúreme Jesúsu jáu sun lánigu.

Igáburi le áubei lagúndaara Búngiu

4 ¹Nidújeñu, subúditi luwúyeri igáburi le áubei lagúndaara Búngiu jun, queísi warúfuduni jun, jagáburiduña ítara. Guetó, nidújeñu, ayúmuruaguatiwa jun láu líri Wabúreme Jesucrístu lun ítaramemetima lan jagáburidun queísi labúseeruni Búngiu.

²Jarítaguatün luágu arúfudajani le wíchugubei jun láu lugúmadin Wabúreme Jesúsu. ³Le labúseerúbei Búngiu, lun jabágaridun derégeguañ júngua lun, lun úa lan ni ában agámariduti mamáriedunga, ⁴lun cáda lan ában láluajanun lúmari lau lubuídun arítaguñi queísi labúseeruni Búngiu, lídan lubúdubu, ⁵máma láu luríban ayúmajani quei jadúgüni gürígia ja ibídiñejabubaña lun Búngiu. ⁶Úa la ni ában adúgüti wuríbani lun lidúje láu lagámaridunun lúmari, jéreti labeichuni Búngiu le adúgüti cátei le, queísi waríñaguni jun. ⁷Máma lun wabágaridun lídan iwíyeni lagúara Búngiu woun lun lánigu wamá, busénti lun wabágaridun derégeguañ woúngua lun. ⁸Ítara líña lubeíti, le amájaruti lerésibiruni arúfudajani le, máma lun ni ában wügúri lamájara, lun Búngiu lamájara, Búngiu le íchugubalin Sífiri Sándu woun.

⁹Luágu jínsiñejabu joun lánigu Búngiu, úati ni cáta lun nabúrújani jun lugúndun arúfudajaali Búngiu guánarügü jun lun jínsiñegua jumá, ¹⁰áni ítara líña jadúgüni joun sun jidújeñu lueígiñe Jesucrístu ja lídaanbaña sun ubúruгу Macedónia. Láu sun líra, nidújeñu, ayúmuruaguatiwa jun lúntima lagánwoundun jínsiñejabu. ¹¹Jóucha jumá jabágaridun darángilañu, beréseguñu lídan le lúnbei jadúgüni. Nadágimein jumá lun janúriragun júngua, quei waríñaguni jun, ¹²inébe jumámuga joun ja mafíñebaña luágu Jesucrístu, úa lámuga gíñe jemégeirun.

Liábin Crístu

¹³Nidújeñu, mabúseerúntiwa lun jeréderun ibídiñounga jun cába lan asúsereda joun jiláaña, luef jajírudagun quei ja meménigidunbaña luágu njein lan ában ibágari lárigiñe ouweni. ¹⁴Ítara quei afíñe wamá luágu jilá lan Jesúsu áni sará ligía lídaangiñe ouweni, ítara líña gíñe afíñe wamá luágu lásaaragüdübaña lan Búngiu ja ouwegubaña afíñeñu luágu Jesúsu.

¹⁵Ligía waríñagunbei jun queísi larúfudajan Wabúreme Jesúsu, luágu wagía lánme le wínwangilibei dánme liábin, mámaba wagía ñúdün

jabáragiñe ja jiláguaañabaña. ¹⁶Dánme le arárireina lan Wabúreme Jesúsu siélugiñe, ábame lagúarun joun jiláaña lun jásaarun, lagaambúba lumálali jábuti ánjeligu, lúma lumálali lifíðun Búngiu. Gürígiamenti ja oúwegubaña afíñeñu luágu Crístu, jagíaba ásaara furúmiñe. ¹⁷Lárigiñeme, ábame wásaarun, wagía afíñetiña ja wínwangiñabaña, ábame wanügúniwa úara jáma lídoun juánriñu lun wadúnragun lúma Wabúreme Jesúsu garábalirugu. Ábamenti weréderun lúma Wabúreme Jesúsu lun sun dan. ¹⁸Ligíati rújuma lubeí gurásu júngua láu dimúrei buri le.

5 ¹Ánjeinti luágu cába lan dan lasúsereda buri cátei le, nidújeñu, mabúseerúnwati nabúrűjan jun. ²Subúdi jumáli buídu buídu luágu lachúlürüba lan wéyu ligía dánme magúrabúniwa lan, queísi liábin ában íwerujati áriebru. ³Dánme añaja lan gürígia aríñaga. “Lídaañein dan sun cátei áni úati mégeiti”, ligíame liábin gürínguau jawágun sódini quei liábin agáriduni tun wúri dageñatu, siñabeiti jeséfurun. ⁴Ánjeinti jugúya, nidújeñu ja afíñebaña luágu Jesucrístu, máma lídaañadün lubúriga luágu cátei lánina Búngiu lun lárügüdünün luwéyuri liábin Crístu quei lárügüdün ában jíweruti. ⁵Lídaañadün larúgounga sun jugúya, máma wagía lánina áriebru lúma lubúriga. ⁶Ligía moún lubei lun maráanserun wamá quei ja maffíñebaña luágu Jesucrístu, lúnti deréñuma wamá lubá lagíribudun, lídan wagíame lubuídun wachúgü. ⁷Ja arúmugubaña, áriebru jarúmuga, ja abácharuadubaña, áriebru jabácharuada. ⁸Ánjein wagía le lánina wéyuagu, lúnti lídan wamá lubuídun wachúgü. Lúnti wadáuragun woúngua láu affíñeni lúma láu ínsíñeni queísi ladáuragun súdaara láu laníguagu lun loúnigiruni. Lúnti gíñe jeménigi wamá luágu wasálbarun le ítarabei quei bunídi le áubei ladáurei súdaara lábulugu lun loúnigiruni. ⁹Máma lun labeíchuniwa Búngiu lanúadajawa, lun wibíjini asálbaruni lídaangiñe Wabúreme Jesucrístu lanúadajawa. ¹⁰Jiláti Jesucrístu wawágu lun wabágaridun úara lúma, wínwañu wagía yebe, jiláñu yebe wéyume le liábin. ¹¹Ligía rúmeme jumá lubeí gurásu lúma érei júniwagua ítara quei jadúgüni guetó.

Laríñaguni Páblo joun afíñetiña ída lúba lan jagáburidun

¹²Nidújeñu, ayúmuraguatiwa jun lun inébe jamá ja ñadágimeinbaña jagánagua jun, ja abúgurubalün, adímureja jagía jun lídan líri Crístu.

¹³Lúnti jínsiñe jamá jun sarágu luágu wadágimanu le jadúgübei. Abágarida jumá lídan dan jáma jíbirigu.

¹⁴Aríñagatiwa gíñe jun, nidújeñu, lun jerérun joun ja májatiña jawádigimaridun, lun jíchugun gurásu joun ja magúraasunbaña, lun jídéraguniña ja débilibaña lídan jafíñen, lun gíñe gagúraasun jumá jabá súngubei.

¹⁵Úa la ni ában afáyeyuruti wuríbani luágu wuríbani. Joúcharügü jumá jadúgün buíti jagánagua, lúma joun sun gürígia.

¹⁶Gúnda jumá súnwandan. ¹⁷Ayúmuragua júma lun Búngiu sun dan. ¹⁸Teínqui jumeí luágu sun le asúsereduti—buíti, wuríbatí, niján le labúseerúbei Búngiu júmagine, queísi afíñetiña luágu Jesucrístu.

¹⁹Merédera jumeí luwádigimari Sífiri Sándu tídan janígi. ²⁰Mamájara jumá lun dimúrei le laríñagubei Búngiu jayúmulugugiñe jidújeñu lueígiñe Jesucrístu. ²¹Jóucha jumeí sun arúfudajani aríja jumeíme ánjein lúmagiñeti lubeí Búngiu, ábame jeréderun lau le inárünibei. ²²Dise jumá lueí sun luwúyeri wuríbaní.

²³Búngiu guánarügü, le íchugubei darángilaü, derégeguagüdalaün júngua lun le gumúti, areída loúme juwáni, janígi luma júgubu dayáru, jarúmañu, lubá líábin Wabúreme Jesucrístu. ²⁴Úaraguati Búngiu le agúarubei jun lun lánigu jumá, lagúmuchubei ladügüni sun cátei buíti le jídan.

Lagúmujoún buri mábugaü lúma abíniruni

²⁵Nidújeñu, ayúmuragua jumá lun Búngiu wawágu.

²⁶Chúgua júma júngua lídan líri Wabúreme, arúfuda jumámugei luágu lídaañadiwa lan ában wámagua.

²⁷Aríñagatina jun láu lugúmadin Wabúreme, lun jalíjanun gárada to joun sun wadújeñu lueígiñe Jesucrístu.

²⁸Binílaün Wabúreme Jesucrístu. Ítaralá.